

Dr. Ernst Maria Lieber

Autor(en): **[s.n.]**

Objektyp: **Obituary**

Zeitschrift: **Igl Ischi : organ della Romania (Societat de Students Romontschs)**

Band (Jahr): **6 (1902)**

PDF erstellt am: **23.07.2024**

Nutzungsbedingungen


Die ETH-Bibliothek ist Anbieterin der digitalisierten Zeitschriften. Sie besitzt keine Urheberrechte an den Inhalten der Zeitschriften. Die Rechte liegen in der Regel bei den Herausgebern.

Die auf der Plattform e-periodica veröffentlichten Dokumente stehen für nicht-kommerzielle Zwecke in Lehre und Forschung sowie für die private Nutzung frei zur Verfügung. Einzelne Dateien oder Ausdrucke aus diesem Angebot können zusammen mit diesen Nutzungsbedingungen und den korrekten Herkunftsbezeichnungen weitergegeben werden.


Das Veröffentlichen von Bildern in Print- und Online-Publikationen ist nur mit vorheriger Genehmigung der Rechteinhaber erlaubt. Die systematische Speicherung von Teilen des elektronischen Angebots auf anderen Servern bedarf ebenfalls des schriftlichen Einverständnisses der Rechteinhaber.

Haftungsausschluss

Alle Angaben erfolgen ohne Gewähr für Vollständigkeit oder Richtigkeit. Es wird keine Haftung übernommen für Schäden durch die Verwendung von Informationen aus diesem Online-Angebot oder durch das Fehlen von Informationen. Dies gilt auch für Inhalte Dritter, die über dieses Angebot zugänglich sind.



Dr. Ernst Maria Lieber.



Sche il grond menader dil centrum tudestg anfla en quests fepls ina biografia, astgan nos lecturs buc esser surstai. Dapi ils 10 de Settember 1900 ha Dr. Lieber apparteniu alla Romania. El fuva in activ e premurau commember, che prendeva la pli viva part vid igl operar de nossa societad e legieva nunditgont sias biaras occupaziuns igl Ischi naven dagl empren tochen tiel davos fepl. Repetidamein ha el fatg differentas observaziuns sur ina ne l'otra lavur comparida en nies organ, ed orda quei vesa ins cont attentamein il permiert legieva quel. En ina brev dils 4 d'Avrel 1901 scretta da Lieber al president della Romania *Dr. P. Tuor* anflein nus ils characteristics plaid: „Nehmen Sie darum auch den verspäteten Dank für Sie und die Romania freundlich auf, verehrtester Herr Präsident! Er ist darum nicht weniger aufrichtig und herzlich. Ich werde suchen, ihn durch redliches Bemühen zu betätigen, die schönen Zwecke der jungen Gesellschaft auch an meinem Teil und Platz als ächter Compatriot nach aller Tunlich-

keit zu fördern, und der herrlichen tschontscha romontscha auch im deutschen Reiche verständnisvolle Würdigung zu verschaffen. Wäre ich nur noch mal so jung, wie Sie und unsere lieben jungen Freunde, die den kecken Wurf gewagt.“ Lieber ha sedau gronda breigia de far enconoschenta la stupenta scartira de *P. Maurus Carnot: Im Lande der Rätomanen*, en la pressa e literatura tudestga.

Dapi che Lieber haveva anflau, che sia familia seigi emigrada da Ladir en tiara tudestga, ed el seigi oriundamein in *Calivers de Ladir*, eis el repetidamein vegnius en la Surselva, la quala era ad el enconoschenta e cara. Nus vegnin mai ad emblidar, co Lieber, profundamein commuentaus, ei entaus cun nus l'emprema gada en la baselgia de Ladir, nua che ses antenats havevan orau, ed el senterì della quala els ruaussan. El haveva aunc bia saun sursilvan en las aveinas, il menader dil centrum tudestg; ord sia maniera de plidar, sco ord sia vivacitat e ses gièsts, sefagieva sentir igl origin latin.

Ernest Maria Lieber ei naschiu ils 16 de Nov. 1838 a *Camberg* el ducat de Nassau. Siu bab era *Dr. Moriz Lieber* e sia mumma ina naschida *Hilt* ded Oberursel sper Homburg. Il bab ded Ernest era in um d'ina gronda e vasta savida, versaus en la scienza giuridica, historica e teologica, in ferm e decidiu character, in clar tgau ed ina rara forza de lavur. Il menader della direziun decidida catolica ella diocesa de *Limburg*, ha Moriz Lieber priu ina fetg viva ed impurtonta part vid *la damonda de Cologna*, cura ch'igl uestg *Droste-Fischering* era vegnius mess en perschun. Suentar la revoluziun de 1848 ha el luvrau ora per ils uestgs tudestgs *il Memorandum*, che quels

han fatg il lur sin la redunonza de *Würzburg*. Sco bein buc in auter dils menaders catolics ha Moriz Lieber luvrau, per far pusseivel in *di dils catolics tudestgs*, ed el ha presidiau quella redunonza differentas gadas. Tier in tal bab eis ei de capir, che Ernest ha schon sco affon s'entusiasmau per la caussa catolica, e che ils vehements combats, dils quals el era perdetga, han dau ad el sia futura direcziun religius-politica. Suentar haver fatg il gimnasi ad *Aschaffenburg* ed *Adamar*, ha Ernest Lieber frequentau las universitats de *Würzburg*, *München*, *Bonn* e *Heidelberg*. Liung temps buca decidius, sch'el vegli sededicar alla historia e literatura ne al jus, ha Lieber tedlau fetg bia collegs filosofics e tras in liung, premurau studi acquistau quella vasta e solida savida, che ha pli tard prestau schi buns survetschs en ils gronds combats parlamentarics. En igl emprem e pli vehement temps dil combat culturian sco pli tard en las principalas debattas sur la scola, il stat e la literatura et autras damondas han sez ils adversaris stuiu ammirar las grondas e detagliadas enconoschientschas, che Lieber haveva en ils differentes roms scientifics. Se-tractava ei dalla inquisiziun ne dalla polemica religiosa de Luther, da Gregor VII ne dagl uestg Wessenberg, Lieber tschentava adina siu um en quellas difficultas debattas, e citava in diember ded auturs ed ovras, las qualas mo in liung e profund studi en giuvens onns san emplunar en la memoria. Mo la baulda mort dil bab ha clamau Lieber a casa, nua ch'el ha stuiu seprender en pils interess della familia. L'emprema ga, che Lieber ei passaus ella veta publica, ei stau per domandar, ch'ins tuorni a menar en la scola confessionala catolica en la provinzia de

Limburg, la quala era dapi 1866 incorporada alla Prussia. Tras ils numerus artechels ch'el ha scret, ed ils biars plaids ch'el ha teniu, per turnar a survegnir la scola catolica, ei siu num vegnius enconoschents luntsch sur ils confins della provinzia ora. Ils clars e decidi principis, la gronda savida dil giuven menader explicheschan, ch'el ei 1870 vegnius elegius ella dieta prussiana e 1871 en il parlament digl imperi. *Ils 21 de Mars 1871 ha Lieber cun 67 auters deputai fundau la partida dil centrum, ed el ei staus igl empren actuar de quella fracziun.*

Mai ha ina partida politica giu ina schi grondiusa influenza sin la svilupaziun religiosa e culturana dils catolics, sco il centrum. Pli ché 30 onns ha quella partida cun nunalterabla consequenza, roburusa energia ed in rar cletg battiu per las ideas catolicas sin ils pli differentes camps della veta publica. La forza della partida dil centrum schai en la maniera, co ella han adina consequentamein priu ina posiziun principiala visavi a tut las damondas dil di. Ils principis catolics ein stai il compass, che ha dirigiù la nav dil centrum e che ha preservau quella, de sepiarder en ina politica, che quenta mo cul success d'in di. Grad la solida, absolutamein principial-catolica politica ha uniu il pievel catolic daven da Holstein tochen si els quolms della Baviera entuorn la bandiera dil centrum, e fatg orda quella la pli pusenta partida politica digl imperi tudestg. Stretgamein unius cun il grond *Malinckrodt* ha Lieber saviu persequitar dagl empren moment naven era la pli intima historia della giuvna partida. In prompt e capavel debatter, ha Lieber repetidamein schon en ils emprems onns priu ina fetg remarcabla part vid

las grondiusas debattas, che characteriseschan il temps dil combat culturian. Enconoschenta ei la curaschusa e ventireivla maniera, co el ha catschau *Bismark* ellas stretgas ella discussiun sur dils zens de Rheinbrohl e co el ha refutau las ideas canonisticas dil distinguiu *Sybel*. Dis de gloria ein stai per Lieber las sessiuns, en las qualas el ha giu il grond combat cun *Wehrenpfennig* e *Richter-Sangershausen* sur la personalitat dils reformaturs. Lieber ha mussau ina detagliada, solida enconoschientscha dellas ovras de Luther, Melanchton, sco dils vegls e novs scribents sur la reformaziun, che ha gudignau ad el la stema digl entir parlament.

In sincer amitg dils pigns e fleivels, ha Lieber consequentamein luvrau per reformas socialas en favur dils luvrers en la gronda industria. Las pli remarquablas e saluteivlas proposiziuns socialas dil centrum ein vegnidas tschentadas e motivadas da Dr. Ernest Lieber. Aunc els davos onns, cura ch'el era vegnius il menader dil centrum, ha Lieber repetidamein domandau, ch'ins vegli buca schar ruassar la reforma sociala, mo ch'ins continueschi e bagegi ora quella. Suentar la mort de *Windthorst* ei Lieber staus il menader dil centrum, ed el ha cun la pli gronda circumspeziun e tact saviu mantener alla partida catolica la preponderonta posiziun el parlament digl imperi tudestg. Sia davosa acziun parlamentarica era la schinumnada proposiziun de toleranza, la quala el ha motivau cun in meisteril plaid.

Lieber enconoscheva fetg bein la gronda impurtonza dell'organisaziun per ils catolics, ed el vegneva perquei mai staunchels, de sustener las societats ed uniuns catolicas. Pli che 25 onns udeva el tier ils regu-

lars orateurs sin il di dils catolics, nua che ses plaids survegnevan adina grond applaus. Lieber era in agien, original, marcant oratur; capeva el gie de svegliar l'attenziun e buca mo de mantener, mobein de traso aggrondir quella, era duront in liung discuors.

Sco carstgaun sedistingueva Lieber tras siu bi e bien character. El era in um independent, che se schava ne tementar ne gudignar, cura ch'ei setractava de defender quei ch'el teneva per dretg e dueivel. Differentas aultas plazas, che ins ha giu amogna ad el, ha el buc acceptau. La ragisch de siu entir esser schischeva en sia profunda religiusadat. En ils onns della liunga e dolorosa malsogna ha Lieber mussau, tgei forza la religiun dat al carstgaun, havent el nunditgont las grondas dolurs manteniu la pli compleina ruasseivladat e resignaziun en la veglia de Diu. Era quels ch'eran il pli datier ded el trumpava sia fatscha rienta e siu interess ch'el veva de tut, sur de sia situaziun sanitarica; ei encorschevan zun buc, che ei havevan in um malsaun silla mort avon els. Bab d'ina numerusa familia haveva el en sia excellenta consorta ina dunna, che capeva de mantener ad el il ruaus e la ventira domestica, ch'ein aschi necessaris agl um, che batta ella veta publica.

L'entira tiara tudestga, senza distincziun de partidas, ha renconoschiu, che cun Lieber seigi in distinguuu diplomat, bien patriot e niebel carstgaun vegnius surdaus alla fossa. Quella pauca fegliadella, che nus mettein silla frestga fossa, possi mussar, che la Romania hagi buc emblidau il niebel defunct, il qual ha mussau ad ella schi bia interess e benevolientscha. Il num de *Ernest Lieber* vegn a restar en buna memoria tier il pievel romontsch sursilvan.

A Lumbrein ei nies commember *Gion Giusep Casaulta* morts. Il sincer ed aviert character dil defunct ha gudignau ad el la carezia e stema de ses convischins. Veglien els tener il permiert en buna memoria.

Il proxim Ischi vegn portar il portret ed ina pli vasta biografia digl aultmeritau *Professor Placi Condrau*, commember della Romania.

R. I. P.